



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“, broj 96/13, 89/16, 5/22 i 31/24) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“, broj 103/08 i 5/22), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2022. GODINU HRVATSKE SELJAČKE STRANKE

Broj: 03-07-6-345/23
Sarajevo, 31.01.2025. godine

S A D R Ž A J

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS REVIZIJE	5
Predmet pregleda i kontrole	5
Cilj pregleda i kontrole.....	5
Obim pregleda i kontrole.....	5
4. PRETHODNE KONTROLE I REVIZIJE	5
5. NALAZI I PREPORUKE REVIZIJE	6
5.1 NALAZI.....	6
5.2. PREPORUKE.....	10

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Hrvatske seljačke stranke za 2022. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih u oktobru 2022. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i poglavlja 15 Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2022. godinu, utvrđeno je da je Hrvatska seljačka stranka prekršila odredbe člana 4. stav (1), člana 5. stav (4), člana 8. stav (1), člana 11. stav (1) i člana 12. Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Hrvatske seljačke stranke za 2022. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih u oktobru 2022. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2022. godinu, Hrvatska seljačka stranka se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica (3-a)	0,00	0,00
3.	Prilozi pravnih lica (3-b)	0,00	0,00
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	0,00	0,00
7.	Prihodi iz budžeta (3-f)	29.429,41	100,00
8.	Prihodi od propagande (3-g)	0,00	0,00
I	Ukupni prihodi (1-8)	29.429,41	100,00
II	Ostali prihodi i drugo	0,00	0,00
	Izvori finansiranja (I+II)	29.429,41	100,00

U godišnjem finansijskom izvještaju za 2022. godinu Hrvatska seljačka stranka je iskazala rashode u ukupnom iznosu od 31.999,20 KM.

2. PREDSTAVLJANJE POLITIČKE STRANKE

Naziv političke stranke: Hrvatska seljačka stranka. Skraćeni naziv: HSS.

Hrvatska seljačka stranka je registrovana kod Općinskog suda u Mostaru dana 13.09.2010. godine, Rješenjem broj: R/5-10.

Sjedište političke stranke je u Mostaru, ulica Kralja Petra Krešimira IV L-5¹.

Lice ovlašteno za zastupanje stranke je Mario Karamatić, predsjednik.

Lice ovlašteno za finansijske izvještaje za 2022. godinu je Mario Karamatić.

Prema podacima iz godišnjeg finansijskog izvještaja za 2022. godinu, politička stranka nema niže organizacione odbore.

¹ Hrvatska seljačka stranka je, dopisom broj: Ur.br.1/10/15 od 15.11.2015. godine, obavijestila Centralnu izbornu komisiju Bosne i Hercegovine da će se komunikacija sa strankom obavljati na novoj adresi u Posušju, Ulica Fra Grge Martića 31.

3. OPIS REVIZIJE

Predmet pregleda i kontrole je godišnji finansijski izvještaj Hrvatske seljačke stranke za 2022. godinu i finansijski izvještaj za period od dana podnošenja prijave za ovjeru za izbore do dana ovjere rezultata Općih izbora, održanih u oktobru 2022. godine.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona Bosne i Hercegovine. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskog izvještaja Hrvatske seljačke stranke obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

Obim pregleda je bio ograničen jer politička stranka nije vodila poslovne knjige, pomoćnu knjigu blagajne i nema knjigovodstvene evidencije o prihodima i rashodima.

4. PRETHODNE KONTROLE I REVIZIJE

U periodu od 2010. do 2018. godine, obavljeni su pregledi i revizija finansijskih izvještaja Hrvatske seljačke stranke, nakon čega su izdati izvještaji o pregledu i reviziji sa mišljenjem revizora, nalazima i preporukama revizije, osim 2013. godine za koju stranka Centralnoj izbornoj komisiji Bosne i Hercegovine nije podnijela godišnji finansijski izvještaj, niti je omogućila pristup svojim prostorijama kako bi se izvršila revizija.

Centralna izborna komisija Bosne i Hercegovine je, u okviru svojih nadležnosti utvrđenih u članu 14. stav (2) Zakona o finansiranju političkih stranaka, Odlukom broj: 03-07-6-1104/15 od 09.12.2015. godine Hrvatskoj seljačkoj stranci izrekla administrativnu mjeru, u skladu sa članom 10. stav (8) istog Zakona, kojom se stranci uskraćuje pravo da se kandiduje na narednim izborima (Lokalnim izborima 2016. godine).

Nakon obavljenog pregleda finansijskog izvještaja za 2019. godinu, izdat je Izvještaj o pregledu sa mišljenjem revizora, nalazima i preporukama stranci da finansijska sredstva obezbijedena za finansiranje stranke koristi u skladu sa planom utroška sredstava, a za ostvarivanje ciljeva utvrđenih programom i statutom stranke, da vodi poslovne knjige u skladu sa računovodstvenim propisima, odnosno da vodi evidencije o novčanim tokovima, prihodima, rashodima i obavezama, da finansijske izvještaje koje podnosi Centralnoj izbornoj komisiji Bosne i Hercegovine dostavlja u zakonom propisanom roku i popunjava u skladu sa Pravilnikom o godišnjim finansijskim izvještajima političkih stranaka i da u finansijskom izvještaju iskaže koristi ostvarene od aktivnosti subjekata koji su na bilo koji način povezani sa strankom ili su pod njenom kontrolom. Takođe je stranci preporučeno da uspostavi upravljanje gotovinom putem blagajne i da uvede obavezu vođenja blagajničkih izvještaja na dnevnom nivou uz obavezne priloge, te da poslovanje blagajne uredi tako da se razgraniče dužnosti odobravanja isplate, evidentiranja i isplate gotovine uz prethodno definisanje visine blagajničkog maksimuma.

Nerealizovane preporuke:

Na osnovu uočenih nedostataka u godišnjem finansijskom izvještaju za 2022. godinu, utvrđeno je da Hrvatska seljačka stranka nije ispoštovala date preporuke.

5. NALAZI I PREPORUKE REVIZIJE

5.1 NALAZI

a) Hrvatska seljačka stranka prekršila je odredbe člana 4. stav (1) Zakona o finansiranju političkih stranaka².

Hrvatska seljačka stranka je u godišnjem finansijskom izvještaju za 2022. godinu iskazala ukupne rashode u iznosu od 31.999,20 KM.

Hrvatska seljačka stranka nije Centralnoj izbornoj komisiji Bosne i Hercegovine uz godišnji finansijski izvještaj za 2021. godinu dostavila program utroška sredstava za 2022. godinu, što je bila obavezna učiniti.

S obzirom da je stranka finansijska sredstva utrošila bez programa utroška, prekršila je odredbe člana 4. stav (1) Zakona o finansiranju političkih stranaka.

b) Hrvatska seljačka stranka prekršila je odredbe člana 5. stav (4) i člana 8. stav (1) Zakona o finansiranju političkih stranaka

Hrvatska seljačka stranka nije u godišnjem izvještaju za 2022. godinu iskazala prilog pravnog lica u iznosu od 10.000,00 KM koji je primila od Hrvatske demokratske zajednice BiH po osnovu otpisa obaveza po datim pozajmicama, čime je prekršila odredbe člana 5. stav (4) Zakona o finansiranju političkih stranaka.

Hrvatska seljačka stranka je u godišnjem finansijskom izvještaju za 2021. godinu, koji je dostavila Centralnoj izbornoj komisiji BiH, iskazala obavezu po osnovu pozajmice prema Hrvatskoj demokratskoj zajednici BiH u iznosu od 10.000,00 KM. U godišnjem finansijskom izvještaju za 2022. godinu stranka nije iskazala obavezu po osnovu navedene pozajmice. Kontrolom izvoda sa transakcijskog računa utvrđeno je da stranka u 2022. godini nije vratila pozajmicu. Stranka je dostavila izjavu broj 10/08-24 od 22.08.2024. godine u kojoj izjavljuje da ima aktivnu pozajmicu prema HDZ BiH, te da je njeno vraćanje planirano do kraja 2024. godine. Uz izjavu, stranka je dostavila ugovor o kratkoročnoj pozajmici broj 003/19 od 29.07.2019. godine.

Uvidom u analitičku karticu, koju je Službi za reviziju dostavila Hrvatska demokratska zajednica BiH prilikom revizije za 2021. godinu, utvrđeno je da je Hrvatska demokratska zajednica BiH dana 31.12.2021. godine izvršila otpis kratkoročnih kredita datih pravnim osobama, odnosno Hrvatskoj seljačkoj stranci, u iznosu od 10.000,00 KM na teret ostalih rashoda iz ranijih godina.

Imajući u vidu da se politička stranka Hrvatska demokratska zajednica BiH u 2021. godini i 2022. godini finansirala prihodima iz budžeta, Hrvatska seljačka stranka je ostvarila prilog političke stranke, koja je zabranjena odredbama člana 8. stav (1) Zakona o finansiranju političkih stranaka.

c) Hrvatska seljačka stranka prekršila je odredbe člana 11. stav (1) i člana 12. Zakona o finansiranju političkih stranaka.

Pregledom godišnjeg finansijskog izvještaja, utvrđeno je da Hrvatska seljačka stranka nije vodila poslovne knjige i nema evidencije o prometu i stanju novčanih sredstava, prihodima, rashodima i obavezama, nije sačinila i podnijela Godišnji obračun (Završni račun) za 2022. godinu nadležnoj instituciji, Finansijsko-informatičkoj agenciji³ i nije godišnji finansijski izvještaj popunila u skladu sa odredbama Pravilnika o godišnjim finansijskim izvještajima političkih stranaka (u daljem tekstu:

² U skladu sa odredbom člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog zakona može koristiti isključivo za ostvarivanje ciljeva utvrđenih svojim programom i statutom.

³ Na Zahtjev Centralne izborne komisije BiH stranci u kojem je traženo da dostavi Bruto bilans stranke na dan 31.12.2022. godine, dokumentaciju o korištenju poslovnog prostora, glavnu knjigu sa analitičkim evidencijama, kopiju završnog računa, kopije izvoda sa transakcijskih računa Addiko banke i UniCredit banke i kopiju ugovora o novčanim pozajmicama političkoj stranci, stranka je između ostalog dostavila izjavu broj: 07/08-24 od 22.08.2024. godine u kojoj je navela da nije vodila poslovne knjige.

Pravilnik), čime je prekršila odredbe člana 11. stav (1) i člana 12. stav (1)⁴ i stav (4) Zakona o finansiranju političkih stranaka.

- (1) U obrascu 2 (pregled prometa svih transakcijskih računa političke stranke) godišnjeg finansijskog izvještaja stranka je iskazala promet po transakcijskom računu broj: 3060060001013423 kod Addiko banke d.d. Sarajevo: početno stanje u iznosu od 286,01 KM, ukupni ulazi u iznosu od 59.699,41 KM, ukupni izlazi u iznosu od 34.071,70 KM i stanje na dan 31.12.2022. godine u iznosu od 25.913,72 KM.

Stranka je uz dodatnu dokumentaciju dostavila Obavještenje o raskidu Ugovora br. 10000717 o deponovanju novčanih sredstava po viđenju i obavljanju poslova platnog prometa od 15.11.2022. godine, kojim Addiko banka obavještava stranku o raskidu ugovora uz primjenu otkaznog roka od 30 dana, te poziva stranku da ispostavi nalog za prenos sredstava na drugi račun. Uvidom u Izvještaj Centralne banke Bosne i Hercegovine utvrđeno je da je transakcijski račun broj: 3060060001013423 kod Addiko banke d.d. Sarajevo ugašen dana 13.12.2022. godine.

Kontrolom izvoda sa transakcijskog računa utvrđeno je da je stranka po ovom transakcijskom računu ostvarila promet kako slijedi: početno stanje u iznosu od 286,01 KM, ukupni ulazi 59.699,41 KM, ukupni izlazi 59.985,42 KM i stanje na dan 31.12.2022. godine 0,00 KM.

Stranka nije iskazala tačan promet po transakcijskom računu, te je prekršila odredbe člana 11. Pravilnika.

- (2) U obrascu 2.1 (pregled stanja blagajne) godišnjeg finansijskog izvještaja stranka je iskazala promet ulaza u iznosu od 1.400,00 KM i promet izlaza u iznosu od 1.400,00 KM, te početno stanje i saldo na dan 31.12.2022. godine u iznosu od 0,00 KM.

Hrvatska seljačka stranka nije vodila blagajnički dnevnik i nema dokumentaciju o prometu blagajne, te je pregled ograničen na podatke iz izvoda sa transakcijskog računa.

Uvidom u izvode sa transakcijskog računa utvrđeno je da je stranka podizala novac sa ovog računa u svrhu materijalnih troškova kako slijedi: dana 21.01.2022. godine u iznosu od 800,00 KM, dana 11.07.2022. godine u iznosu od 1.400,00 KM. Dana 13.12.2022. godine, stranka je podigla novčana sredstva u iznosu od 8.640,00 KM sa transakcijskog računa za potrebe blagajne.

Stranka je bila obavezna sredstva u iznosu od 10.840,00 KM evidentirati kao ulaz novčanih sredstava u blagajnu, što nije učinila, čime je prekršila odredbe člana 12. Pravilnika.

- (3) Hrvatska seljačka stranka nije u godišnjem finansijskom izvještaju prijavila prilog pravnog lica i nije pravilno iskazala prihode iz budžeta, čime je prekršila odredbe člana 13., 15. i 19. Pravilnika.

1. S obzirom da Hrvatska seljačka stranka nije Hrvatskoj demokratskoj zajednici BiH vratila pozajmicu u iznosu od 10.000,00 KM, a koju je Hrvatska demokratska zajednica BiH otpisala u 2021. godini, ostvarila je novčanu donaciju Hrvatske demokratske zajednice BiH koju je u skladu sa Pravilnikom o godišnjim finansijskim izvještajima političkih stranaka i Zakonom o finansiranju političkih stranaka bila dužna evidentirati u poslovnim knjigama i prijaviti u godišnjem finansijskom izvještaju za 2022. godinu.

Stranka nije u obrascu 3-b (prilozi pravnih lica) iskazala prilog Hrvatske demokratske zajednice BiH, te je u godišnjem finansijskom izvještaju ukupne prihode iskazala u manjem iznosu za 10.000,00 KM u odnosu na ostvarene.

Takođe, Hrvatska seljačka stranka je bila dužna izdati potvrdu o primljenom prilogu što nije učinila, čime je prekršila odredbe člana 6. Pravilnika.

2. Hrvatska seljačka stranka je u godišnjem finansijskom izvještaju, u obrascu 3-f (prihodi iz budžeta) iskazala sredstva iz budžeta Federacije Bosne i Hercegovine u iznosu od 25.000,00 KM i budžeta općina i gradova: Posušje u iznosu od 1.000,00 KM, Grude u iznosu od 1.000,00 KM, Čapljina u iznosu od 900,00 KM i Stolac u iznosu od 1.529,41 KM.

⁴ Politička stranka dužna je voditi poslovne knjige i podnositi finansijske izvještaje na način koji je utvrđen zakonom i drugim propisima u skladu sa zakonom.

- Uvidom u dostavljene podatke Vlade Federacije Bosne i Hercegovine⁵ utvrđeno je da iz budžeta Federacije Bosne i Hercegovine nije bilo uplata tokom 2022. godine za Hrvatsku seljačku stranku.

Kontrolom izvoda sa transakcijskog računa utvrđeno je da je dana 09.12.2022. godine Centralna izborna komisija Bosne i Hercegovine na račun stranke uplatila sredstva u iznosu od 25.000,00 KM po osnovu povrata uplaćenog iznosa takse za ovjeru prijave za učešće na Općim izborima 2022. godine.

S obzirom da novčana sredstva od povrata takse ne predstavljaju prihod stranke, Hrvatska seljačka stranka je u godišnjem finansijskom izvještaju ukupne prihode i prihode iz budžeta iskazala u iznosu većem od ostvarenih za 25.000,00 KM.

- Stranka je sredstva iz budžeta Grada Stolac za period januar-juni u iznosu od 1.529,41 KM, koja je grad uplatio na račun stranke dana 08.07.2022. godine, iskazala kao prihode iz budžeta Grada Stolac.

Uvidom u dostavljene podatke o izvršenim uplatama političkim subjektima u toku 2022. godine⁶ utvrđeno je da je Grad Stolac dana 29.12.2022. godine u skladu sa Odlukom o raspodjeli sredstava za parlamentarne grupe u Gradskom vijeću za razdoblje juli-decembar izvršio uplatu u iznosu od 1.529,41 KM na račun Hrvatske seljačke stranke, ali je nalog odbijen jer je račun stranke ugašen.

Grad Stolac je na osnovu izjave vijećnika Vinka Boškovića⁷ sredstva u iznosu od 1.529,41 KM, koja su budžetom planirana za Hrvatsku seljačku stranku uplatio na račun HDZ BIH - Gradski odbor Stolac broj: 3382702200133761.

Hrvatska seljačka stranka nije vodila poslovne knjige i nema evidenciju o navedenim sredstvima.

- (4) U obrascu 4.1 (režijsko-administrativni i ostali rashodi) Hrvatska seljačka stranka je iskazala ostale rashode u iznosu od 25.000,00 KM.

Uvidom u izvode sa transakcijskog računa utvrđeno je da je stranka dana 24.05.2022. godine platila taksu za ovjeru za učešće na Općim izborima 2022. godine u iznosu od 25.000,00 KM. S obzirom da su novčana sredstva po osnovu takse vraćena političkoj stranci, stranka nije ostvarila rashode u navedenom iznosu.

Na osnovu navedenog utvrđeno je da je Hrvatska seljačka stranka troškove iskazala u većem iznosu za 25.000,00 KM od ostvarenih, čime je prekršila odredbe člana 21. i 22. Pravilnika

- (5) Hrvatska seljačka stranka nema evidencije o svojim obavezama i nije iskazala sve obaveze po pozajmicama čime je prekršila odredbe člana 24. Pravilnika. Takođe je utvrđeno da su novčana sredstva po osnovu ta

- Stranka je u obrascu 5.1 (obaveze političke stranke po kreditima i pozajmicama) iskazala četiri pozajmice fizičkog lica Mario Karamatić u ukupnom iznosu od 28.200,00 KM.

Uvidom u izvode sa transakcionog računa utvrđeno je da je Mario Karamatić dana 23.05.2022. godine i 24.05.2022. godine dao dvije pozajmice u iznosu od po 9.000,00 KM, odnosno ukupno 18.000,00 KM. Takođe, utvrđeno je da je dana 20.05.2022. godine Hrvatska seljačka stranka izvršila polog gotovine u iznosu od 4.000,00 KM, a dana 24.05.2022. godine polog gotovine u iznosu od 7.000,00 KM, koji su u godišnjem finansijskom izvještaju iskazani kao pozajmice.

Stranka je dana 13.12.2022. godine sa transakcijskog računa isplatila sredstva u iznosu od 9.000,00 KM i sredstva u iznosu od 8.200,00 KM na ime povrata pozajmice fizičkom licu Mario Karamatić.

⁵ Dostava podataka broj: 06-11-82/2022 od 21.02.2023. godine

⁶ Dostava podataka 01/1-240-1/23 od 02.03.2023. godine

⁷ Izjava Vinko Bošković od 30.12.2022.godine

Hrvatska seljačka stranka je dostavila dva ugovora o kratkoročnoj pozajmici i to: ugovor o kratkoročnoj pozajmici broj: 001/20 od 20.05.2020. godine u iznosu od 9.000,00 KM i ugovor o kratkoročnoj pozajmici broj 002/20 od 23.05.2020. godine u iznosu od 9.000,00 KM na transakcijski račun i 7.000,00 KM gotovinski.

Stranka nema pravilne i tačne evidencije o svojim obavezama po pozajmicama, te je u godišnjem finansijskom izvještaju iskazala obaveze za pozajmice prema Mariju Karamatiću u iznosu većem za 17.200,00 KM.

- Hrvatska seljačka stranka nije u godišnjem finansijskom izvještaju za 2022. godinu iskazala obaveze po pozajmici prema Damiru Pavkoviću u iznosu od 10.000,00 KM, čime su i ukupne obaveze stranke na dan 31.12.2022. godine iskazane u manjem iznosu za 10.000,00 KM.

U godišnjem finansijskom izvještaju za 2021. godinu i predizbornom finansijskom izvještaju za 2022. godinu stranka je iskazala obaveze po pozajmicama prema Damiru Pavkoviću u iznosu od 10.000,00 KM.

Uvidom u dostavljene izvode sa transakcionog računa stranke za 2022. godinu, utvrđeno je da stranka putem transakcionog računa nije vratila pozajmicu.

- (6) Hrvatska seljačka stranka je u skladu sa odredbom člana 12. stav (2) Zakona o finansiranju političkih stranaka⁸ imala obavezu da u godišnji finansijski izvještaj uključi koristi ostvarene od aktivnosti udruženja „Hrvatski narodni sabor Bosne i Hercegovine“, koje je povezano sa političkom strankom, jer je stranka članica ovog udruženja.⁹

d) Hrvatska seljačka stranka taksu za ovjeru za učešće na izborima nije platila sa transakcionog računa za finansiranje izborne kampanje.

Kao transakcioni račun koji je, u skladu sa odredbama člana 4.4 stav (1) Izbornog zakona BiH, bila obavezna otvoriti i namjenski koristiti za finansiranje izborne kampanje, stranka je prijavila glavni transakcioni račun stranke broj: 3060060001013423 kod Addiko banke d.d..

Taksu za ovjeru za učešće na Lokalnim izborima 2022. godine, politička stranka je, suprotno Odluci o visini takse za ovjeru za učešće na Opštim izborima 2022. godine, umjesto sa posebnog transakcionog računa za finansiranje izborne kampanje, uplatila sa glavnog računa stranke.

Troškovi izborne kampanje

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM¹⁰ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Hrvatska seljačka stranka je u svrhu izborne kampanje mogla da potroši sredstva u iznosu od 240.727,22 KM.

Hrvatska seljačka stranka u godišnjem finansijskom izvještaju za 2022. godinu nije iskazala troškove propagande.

⁸ Politička stranka obavezna je u svom izvještaju uključiti sve koristi ostvarene od aktivnosti subjekata koji su na bilo koji način povezani sa političkim strankama ili su pod njenom kontrolom.

⁹ Hrvatski narodni sabor Bosne i Hercegovine kao udruženje promoviše političke stranke i njene članove, učestvuje u provođenju izborne kampanje i kreira programe koji su bitni samo političkim strankama, članicama ovog udruženja.

¹⁰ Član 15.10 stav (2) Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

5.2. PREPORUKE

Preporučuje se Hrvatskoj seljačkoj stranci da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da svake godine donosi program utroška sredstava i da finansijska sredstva obezbijedena za finansiranje stranke koristi u skladu sa utvrđenim planom utroška sredstava,*
- *da vodi poslovne knjige u skladu sa računovodstvenim propisima, odnosno da vodi evidencije o novčanim tokovima, prihodima, rashodima i obavezama i završni račun podnosi nadležnim institucijama,*
- *da vodi evidencije o primljenim priložima,*
- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka,*
- *da u finansijskom izvještaju iskaže koristi ostvarene od aktivnosti subjekata koji su na bilo koji način povezani sa strankom ili su pod njenom kontrolom i*
- *da poštuje odredbe Izbornog zakona BiH i podzakonskog akta Centralne izborne komisije Bosne i Hercegovine, kojim se uređuje otvaranje namjenskog računa i njegovo korištenje isključivo za finansiranje izborne kampanje.*

Takođe se preporučuje:

- *da uspostavi upravljanje gotovinom putem blagajne i uvede obavezu vođenja blagajničkih izvještaja na dnevnom nivou uz obavezne priloge (nalog uplate i nalog isplate; dokumenta na osnovu kojih se vrše isplate putem blagajne).*

Poslovanje blagajne treba urediti tako da se razgraniče dužnosti odobravanja isplate, evidentiranja i isplate gotovine uz prethodno definisanje visine blagajničkog maksimuma.

KOMENTAR:

U ostavljenom roku, Hrvatska seljačka stranka nije dostavila primjedbe na mišljenje revizora i nalaze revizije date u Preliminarnom izvještaju o pregledu godišnjeg finansijskog izvještaja za 2022. godinu.

Šef Odsjeka za revizijske poslove

Sanja Tošović

Revizor

Tanja Golijanin

Šef Službe za reviziju

Mr.sc Hasida Gušić